

## 每週經課朗誦經文(巴克禮漢羅/教羅)2014/09/28

### 共同經課 - 1

#### 出埃及記十七章一節～七節

1 以色列人全會 thàn 耶和華 ê 命令，照路站，tùi Sin ê 曠野，進前行，tī Lī-hui-teng 紮營，百姓無水 thang lim。  
2 百姓就 kap 摩西計較講：Hō阮有水 thang lim。摩西 kā in 講：Lín 啥事 kap 我計較，啥事試耶和華 ah？3 百姓 tī-hia 真嘴乾，ài lim 水；就哀怨摩西講：你啥事 chhoā 阮 tùi 埃及上來，hō阮 kap 阮 ê kiáⁿ 兒，阮 ê cheng-siⁿ，lóng 嘴乾死 ah？4 摩西就求叫耶和華講：我對 chit-ê 百姓 beh 怎樣做 ah？in 差不多 beh 用石頭 tìm 我。5 耶和華 kā 摩西講：你做百姓 ê 頭前行，chhoā 以色列 ê 長老 kúi-nā 人 kap 你去，你 ê 手 tiòh kiáh 前日 phah 河水 ê 拐 á。6 看 ah，我 beh khiā tī 你 ê 面前，tī Hō-liát ê 石磐頂；你 phah hit-ê 石磐，beh 有水 tùi hia 流出 hō百姓 lim。摩西就 tī 以色列長老 ê 面前 án-ni 行。7 伊名 hit-ê 所在叫 Má-sat，koh 叫做 Bí-lī-pa；因為以色列人計較，koh 因為 in 試耶和華，講：耶和華 tī 阮中間 á 無？

### 共同經課 - 2

#### 詩篇七十八篇一節～四節，十二節～十六節

1 A-sat 教示 ê 詩。1) 我 ê 百姓 ah，lín tiòh 聽我 ê 教示，Àⁿ 耳孔聽我 ê 嘴 ê 話。2 我 beh 開嘴設譬喻，我 beh 講出古早隱密 ê 話，3 就是阮所聽見，所知 ê；亦是阮 ê 祖公傳 hō阮 ê。4 阮無 beh 將 chiah-ê 事對 in ê kiáⁿ 孫隱瞞；Beh 將耶和華 ê 名聲 kap 伊 ê 權能，以及伊所行奇妙 ê 事，傳 hō後世代。12 伊 tī 埃及地，Só-an ê 田，Tī in 祖公 ê 目矙前，行奇異 ê 事。13 伊分開海，hō in 過去；Koh hō水 khiā 起來，親像土堆。14 伊日時用雲 chhoā-in，Thong 暝用火 ê 光 chhoā-in。15 伊 tī 曠野 hō石磐裂開，Hō in choē-choē 水 thang lim，親像 tùi 深淵出。16 伊 hō水 tùi 石磐 chhèng 出，Hō水親像江河流落。

### 共同經課 - 3

#### 腓立比書二章一節～十三節

1 所以若 tī 基督有甚麼勸勉，á 是甚麼仁愛 ê 安慰，á 是有聖神 ê 甚麼交通，á 是有甚麼慈悲憐憫，2 lín tiòh hō我 ê 歡喜充滿，就是同心志，同仁愛，心神和合，心志專一；3 凡事莫得為 tiòh 結黨，á 是為 tiòh 空空 ê 榮光，來做；獨獨大家用謙遜 ê 心看別人 khah 贏 tī 本身。4 Lín tàk 人莫得 kò家己 ê 事，也 tiòh 顧別人 ê 事。5 Lín tiòh 有基督耶穌 ê 心做心；6 伊本有上帝 ê 形狀，無掠 kap 上帝平等做所 tiòh 執守 ê，7 反 tng piàⁿ 空家己，取奴僕 ê 形狀，成做人 ê 樣相；8 已經有親像人 ê 款式，就屈家己，順服到 tī 死，甚至死 tī 十字架。9 所以上帝高升伊極高，賞賜伊 hit-ê 名，poāⁿ 過 tī 萬名 ê 頂面 ê；10 hō見若 tī 天，tī 地，kap tī 地下 ê，tī 耶穌 ê 名，無一個腳頭 u m̄ 跪拜，11 無一個嘴 m̄ 稱呼耶穌基督做主，來歸榮光父上帝。12 所以，我所疼 ê 兄弟 ah，親像 lín bat 常常順 thàn，m̄-nā tī 我 kap lín tī-teh ê 時，就現今我無 kap lín tī-teh，益發 tiòh 用驚惶 ngiàuh-ngiàuh-chhoah，來做成 lín 家己 ê 得救；13 因為 lín 有 hit-ê 意願，有 hit-ê 所行，lóng 是 tùi 上帝為 tiòh 伊 ê 好意來行 tī lín 心內。

### 共同經課 - 4

#### 馬太福音二十一章二十三節～三十二節

23 耶穌入殿，教示人 ê 時，chiah-ê 祭司頭，kap 百姓 ê 長老，就近伊講，你用甚麼權行 chiah-ê 事？koh chī-chūi hō你 chit-ê 權？24 耶穌應講，我亦有一句話 beh 問 lín，lín 若 kā 我講，我 chiah beh kā lín 講我用甚麼權行 chiah-ê 事。25 約翰 ê 洗禮是 tùi tá-lòh 來？是 tùi 天，á 是 tùi 人？In su-khia 議論講，若講，Tùi 天，伊 beh kā 咱講，Án-ni lín 啥事 m̄ 信伊？26 若講，對人，咱又驚百姓；in lóng 掠約翰做先知。27 就應耶穌講，阮 m̄ 知。伊就 kā in 講，我亦無 beh kā lín 講我是用甚麼權行 chiah-ê 事。總是 lín phah 算怎樣？28 人有兩個 kiáⁿ，就近 hit-ê 頭一個講，Kiáⁿ ah，今 á 日去葡萄園做工。29 應講，我 m̄；後來反悔就去。30 Koh 就近第二個，亦 án-ni 講。應講，主 ah，我 beh；就竟然無去。31 此(Chí)兩個 tá-lòh 一個行老父 ê 意思 ah？In 講，頭一個。耶穌 kā in 講，我實在 kā lín 講，chiah-ê 抽餉 ê kap 娼妓事先 lín 入上帝 ê 國。32 因為約翰 tī 義 ê 路就近 lín，lín 無信伊；抽餉 ê kap 娼妓就信伊；koh lín 看了，亦無反悔去信伊。